

CYNGOR CYMUNED LLANBERIS

COFNODION CYFARFOD MIS MAI 2022:

1 CROESO:

Cofnodion cyfarfod y Cyngor a gynhaliwyd yn Y Ganolfan, Llanberis nos Fercher yr 11eg o Fai, 2022 am 7 y.h. Gan mai hwn oedd cyfarfod cyntaf y Cyngor newydd yn dilyn Etholiad ar y 5ed o Fai, estynwyd croeso i'r cyn aelodau a'r rhai newydd gan y Clerc. Nodwyd hefyd y bu newid yn y gynrychiolaeth sirol. Kim Jones oedd wedi ei hethol yn Gyngorydd Sir, dymunodd y Clerc yn dda iddi gan obeithio y byddai aelodau'r Cyngor hwn yn ei chefnogi hyd eithaf eu gallu er lles yr ardal a'i thrigolion. Diolchwyd i'r cyn Gyngorydd Kevin Morris Jones (a oedd wedi penderfynnu rhoi gorau i'r swydd) am ei wasanaeth a'i ymdrechion dros y blynyddoedd y bu'n cynrychioli wardiau Padarn a Nantperis ar Gyngor Gwynedd (CG). Ategwyd hynny gan yr aelodau gan ddiolch i KMJ a dymuno'r gorau i KJ. Wrth groesawu'r aelodau newydd - Emlyn Baylis, Nia Jones a Louise Price gofynnwyd i'r Clerc nodi diolchgarwch i'r cyn aelodau Olwen Gwilym, Beth Holding a Claudia O'Donell am eu gwasanaeth ac anfon gair atynt.

2 ARWYDDO FFURFLENNI:

Cyn dechrau ar waith y cyfarfod rhannwyd dwy ffurflen i'r aelodau eu harwyddo, y gyntaf oedd y Datganiad Derbynn Swydd a'r ail llenwi Cofrestr Buddiannau Cyngorwyr. Yna aethpwyd ati i ethol Cadeirydd ac Is gadeirydd. Enwebwyd Llinos Haf Pritchard a Gwilym Evans gyda LIHP yn cael ei hethol yn Gadeirydd a GE yn Is gadeirydd mewn pleidlais gudd. Dymunwyd y dda i'r ddau.

3 PRESENNOL ac YMDDIHEURIADAU:

Ward Padarn: Rhys ap Gwilym, Emlyn Baylis, Gwilym Evans, Iwan Harding, Heather L Jones, Kevin Morris Jones, Cyngorydd Kim Jones, Nia Jones, Louise Price, Helen Sharp, Trystan Thomas

Ward Peris: Iola Owen, Llinos Haf Pritchard.

Ymddiheuriadau: Pawb yn bresennol.

Hefyd yn bresennol: Dei Tomos (Clerc).

4 DATGAN BUDDIANT:

Cofnodir, os yn berthnasol, o dan y gwahanol benawdau.

5 CADARNHAU COFNODION:

Cadarnhawyd cofnodion cyfarfod nos Fercher y 13eg o Ebrill, 2022 fel rhai cywir ac fe'i llofnodwyd gan y Cadeirydd. Cynnig ac eilio: IO/IH.

6 MATERION YN CODI O'R COFNODION:

1. Cysgodfan Bws:

Wedi ei gosod ac yn ei lle ger Dolafon.

2. Llwybrau:

Roedd y Clerc wedi cysylltu a dau adeiladwr waliau cerrig mewn perthynas a chael pris i drwsio Pont y Meibion yn y Nant. Un pris yn unig a dderbyniodd y Clerc ar gyfer trwsio un o bileri'r bont, bydd yn pwysu ar yr ail ymgymerwr am bris gyda hawl i ddewis y rhataf.

3. National Grid - Gwaith Ffordd:

Cafwyd nifer o gwynion am fod tri set o oleuadau erbyn hyn ar y ffordd rhwng Llanberis a Phenllyn. Holwyd ai dyma fydd y patrwm am yr haf ac fe soniwyd mai am ddau set y bu sôn yn wreiddiol. Yn amlwg mae tri set yn cyflymu'r gwaith ond yn ychwanegu yn arbennig at y rwystredigaeth yr ardalwyr, a gyda cynnydd yn nifer yr ymwelwyr wrth i'r gwanwyn droi yn haf, mae pethau'n debyg o waethygu. Addawodd KJ a'r Clerc wneud ymholiadau.

4. CG - Llochesi Bws newydd:

Roedd y Clerc wedi cysylltu a CG i ddweud nad oedd yn fwiad gan y Cyngor hwn i fabwysiadu y cysgodfannau newydd y bwriedid eu codi fel rhan o gynllun trafndiaeth newydd. Mewn ateb dywedwyd fod CG yn parchu barn y Cyngor, ond yn ychwanegu y byddai'n rhaid iddo ddatgelu mai penderfyniad y Cyngor hwn oedd eu gwrthod pe bai ymholiad neu gŵyn.

5. Llinellau Melyn a Llainwen Uchaf:

Cafodd y Clerc ateb i'r llythyr yn poeni am barcio bler, llinellau melyn wedi gwisgo a'r ffaith na chafwyd ymateb i'r cais am linellau dwbl yn Llainwen Uchaf. Yn anffodus chafwyd dim cydnabyddiaeth fod unrhyw un o CG wedi edrych ac

ystyried a ddylid gosod rhai yno er i'r Cyngor hwn holi am hynny flwyddyn union yn ôl. Roedd hyn meddied oherwydd colli aelodau o staff a llwyth gwaith cynyddol ac roedd hynny wedi golygu fod y rhaglen waith wedi llithro. Ychwanegwyd fod pennaeth newydd ar yr adran Parcio a Gwaith Stryd ac fod y cais am ail baentio'r llinellau melyn wedi ei drosglwyddo i Beiriannydd Ardal Arfon.

Mynegwyd siom a gofynwyd i'r Clerc gysylltu eto ynglyn a'r ddau fater.

6. Siglen Cae Chwarae Ger y Llyn:

Cyflwynwyd prisiau gan ddau gwmni ar gyfer trwsio'r siglen plant hŷn, prynu un newydd ac roedd prisiau hefyd ar gyfer newid safle a phrynu un fwy yn lle'r un bresennol. Cytunwyd nad oedd fawr o bwrpas trwsio gan y byddai angen gwneud yr ochr arall yn fuan, felly penderfynwyd prynu un newydd i fynd i'r un safle. Cwmni lleol fydd yn cyflenwi a gosod, a'r pris ychydig dros £3,500. Cynnig ac eilio: RhaG / TT.

Un o flaenoriaethau eleni ydi ychwanegu offer ar gyfer plant bach yn lle y 'trên goed'. Trafodwyd rhoi sleid yno a gofynnwyd i'r Clerc holi am brisiau. Soniwyd am sleid addas a welwyd yng Nghaernarfon gan rai o'r aelodau. Gofynnwyd i'r Clerc chwilio am gefnogaeth ariannol.

Gan nad oedd y cwmni yswiriant ond wedi rhoi hyd at ganol Mai i adnewyddu'r siglen, bydd rhaid tynnu'r seddi. Awgrymwyd rhoi hysbyseb ar dudalen Facebook y pentref i egluro pam.

7 MATERION ERAILL:

1. Deddf Ilywodraeth Leol ac Etholiadau Cymru 2021:

Diolch i HLL cawsom ein hatgofa am y newidiadau y bydd yn rhaid i'r Cyngor ei wneud yn y dyfodol agos yn unol a'r ddeddf hon. Ymhlith nifer o faterion mae sicrhau fod gwell cysylltiad rhwng y Cyngor a'r cyhoedd o ran mynychu cyfarfodydd a sicrhau eu bod yn ymwybodol o'r hawl i fod yn bresennol. Hefyd bydd angen creu cynllun rhaglen hyfforddiant ar gyfer aelodau'r Cyngor.

2. Gosod Mainc:

Cafwyd cais gan deulu o Lŷn am gael gosod mainc yn Y Fynwent i gofio Gavin Carr, gŵr ifanc lleol a fu farw ddeg mlynedd yn ôl. Yn y cyfamser roedd y Clerc wedi cael cais am wybodaeth ynglyn a meinciau oddi wrth Eglwys Nantperis gan fod fod yr aelodau yn ystyried gosod mainc yno. Awgrymwyd y gellid o bosib symud un o feinciau Mynwent y plwy a'i chynnig i'r Eglwys er mwyn gwneud lle i'r un newydd i gofio Gavin Carr. Addawodd y Clerc drefnu.

3. Defaid Crwydrol - cyflogi bugail:

Yn dilyn trafodaethau rhwng y Clerc a'r Heddlu ynglyn a defaid crwydrol bu trafodaeth gyda Steven Williams, bugail o Fethel sydd hefyd yn ffermio yn Nantperis ynglyn a chael rhywun i gasglu defaid yn achlysurol o Lanberis. Cytunodd SW i ystyried hynny ac wedi trafodaeth penderfynwyd rhoi cynnig eto ar gasglu defaid pan mae criw yn bla yn y pentref. Gofynnwyd i'r Clerc drafod ymhellach efo SW a dod i drefniant ffurfiol. Dylai unrhyw gais am symud defaid ddod trwy law y Clerc, fydd y bugail ddim yn ymateb i gais neb arall. Penderfynwyd holi tybed a fyddai modd gwneud corlan dros dro mewn cornel o Gae'r Ddôl. Cynnig ac eilio: TT / KMJ.

Awgrymwyd hefyd fod y Clerc yn holi Parc Padarn a ellir rhoi giat yn lle'r un a ddiflannodd yng Nghae'r Ddôl a gofyn hefyd i reolwyr y Parc sicrhau fod arwydd ar giatau y cae i atgoffa ymwelwyr o bwysigrwydd eu cau.

4. Cyfieithu::

Wrth nodi fod tymor Olwen Gwilym, Bethan Holding a Claudia O'Donnell wedi dod i ben fel cynhgorwyr penderfynwyd gofyn i BH gario ymlaen a gwaith cyfieithu cofnodion ag ati i'r Cyngor a'r Clerc i drafod telerau.

8 GOHEBIAETH:

1. Llochesi / Cysgodfannau Bws:

Adroddwyd eisioes am hyn yn 6.4 uchod.

2. Nifer o Gylchlythyrau:

9 CYNLLUNIO

• **C22/0005/15/DT** - 33 Dôl Elidir, Llanberis - *cais ar gyfer codi porth to un codiad i du blaen yr eiddo.*

• **C22/0372/15/LL** - DMM Engineering International Ltd, Ffatri Y Glyn, Ystad Ddiwydiannol Y Glyn, Llanberis - *cynnig i godi adeilad diwydiannol (gyda dyluniad diwygiedig yn dilyn caniatâd blaenorol.)*

C22/0395/15/DA - Tir ger 10 Stryd Siarlot, Llanberis - *diwygiad ansylweddol i'r cynlluniau a ganiatawyd o dan ganiatad cynllunio C18/1187/15/LL ar gyfer codi tŷ deulawr teuluol, er galluogi codi uchder y to 0.5m.*

• **NP3/15/LB80N** - Glandŵr, Llanberis, - *Caniatâd Adeilad Rhestredig am estyniad ochr unllawr, ffenestri to, newidiadau mewnol (tynnu partisïynau a ail-leoli grisïau) a gwaith peirianyddol i'r cefn.*

Dim sylw ar gyfer unrhyw un o'r ceisiadau yma.

10 MATERION ARIANNOL:

1) Yn y Banc ar yr 28ain o Ebrill, 2022

Cyfrif Cyfredol: £11,519.47 Cyfrif Cadw: £66.52

2) Cadarnhawyd y taliadau canlynol:

CYFANSWM £7,230.26

3) Arian a dderbyniwyd rhwng 29/03/2022 a 28/04/2022:

CYFANSWM £50.00

4) Adroddiad Blynyddol - Cymeradwyo ac Ardystio Cyfrifon y Llynedd:

Cyflwynwyd mantolen y flwyddyn aeth heibio mewn nifer o ddogfennau gan y Clerc. Roedd y Clerc eisioes wedi rhannu ar ebost restrï oedd yn cynnwys Derbyniadau, Gwariant, Cysoni'r Banc a Gwariant yn erbyn y Gyllideb. Y gweddill oedd £11,465.67, ond gan fod dwy siec heb glirio (un am £4,000 oherwydd bai y Banciau gweler eglurhad yng Nghofnodion Mai 2021/8.1) mae'r swm go iawn yn £7,390.67.

Bu'r flwyddyn a aeth heibio yn flwyddyn o wario sylweddol. Cafwyd cwrs antur newydd a siglen plant bach ar y cae chwarae Ger y Llyn a rhoddwyd wyneb newydd ar y Cae Pob Tywydd (UEFA) tu ôl i'r Ganolfan. Rhwng y tri roedd y gwariant yn agos at £45,000, ond llwyddwyd i godi £22,500 o'r swm hwnnw mewn grantiau a rhoddion, diolch i Cist Gwynedd(CG), Ynni Padarn Peris a First Hydro. Yn ogystal a praesebiad o £34,000 eleni roedd £8,485 i ddod yn ôl oddi wrth Gyllid y Wlad fel ad-daliad Treth ar Werth.

Derbyniwyd yr adroddiad a diolchwyd i'r Clerc am ei gyflwyniad a'i drylwyredd.

Cynnig ac eilio: HLJ / IW

11 Y FYNWENT / LLWYBRAU:

1) Cafwyd cwyn ynglyn a parcio dros y ffordd i'r Fynwent, o flaen yr eglwys. Dywedwyd wrth un oedd yn ymweld a'r Fynwent nad oedd hawl i barcio yno. Gofynnwyd i'r Clerc ysgrifennu neu gael gair a'r sawl a oedd wedi gwneud hynny, a'i atgoffa mai tir cyhoeddus yw'r 'Rheol' ac nad yw wedi ei gofrestru yn enw neb.

12 ADRODDIADAU ALLANOL:

Y Ganolfan:

Adroddwyd fod Y Ganolfan wedi cynorthwyo criw o bobl oedd am gerdded i gopa'r Wyddfa dros nos i godi arian at Ysbyty Plant Alderhay yn Lerpwl. Llwyddodd y criw i godi dros £60,000. Rhoddwyd caniatad iddynt ddefnyddio'r Ganolfan ar yr amod eu bod yn cerdded yn dawel trwy'r pentref. Gwnaed hynny ac roedd canmoliaeth i'w hymddygiad arbennig.

Gefeillio Morbegnio:

Adroddwyd fod bwriad i gynnal cyngerdd yn yr Eglwys ar y 7fed o Orffennaf i groesawu criw o Forbegnio, Yr Eidal, ac mae bwriad i griw oddi yma i fynd allan yno yn yr Hydref.

13 CYFARFOD NESAF:

Dyddiad y cyfarfod nesaf. Nos Fercher yr 8fed o Fehefin, 2022 am 7.00yh yn Y Ganolfan.

Arwyddwyd a chafwyd yn gywir:

Cadeirydd: Llinos Haf Pritchard

Clerc: Dei Tomos

Dyddiad 8fed o Fehefin, 2022